

Obraćanje visokog predstavnika/specijalnog predstavnika EU Christiana Schwarz-Schillinga na konferenciji zemalja članica Evropske unije



Hvala vam ambasadore Schmunk za uvodne riječi; za to što ste organizirali manifestacije koje će se održati ovog vikenda; kao i za to što ste organizirali ovakav skup EU porodice u Bosni i Hercegovini uoči ovog istorijskog jubileja.

U godinama koje su pred nama Evropska unija će igrati sve važniju ulogu u Bosni i Hercegovini, na njenom putu od izgradnje mira ka evropskim integracijama. Vjerovatno će put koji ova zemlja prelazi – od Dayton-a do Brisela – biti složen, dug i težak.

Upravo zato je važna odgovarajuća podrška Evropske unije Bosni i Hercegovini. Upravo zato su važne i prilike poput ove današnje, na kojoj smo svi predstavljeni – Evropska komisija, EUFOR, Posmatračka misija EU, Policijska misija EU i Ured specijalnog predstavnika EU.

Ja sam upravo došao iz Berlina, gdje su u toku pripreme za

sastanak šefova država i vlada Evropske unije povodom obilježavanja 50. godišnjice potpisivanja Rimskog sporazuma. Cijeli kvartovi grada blokirani su u iščekivanju.

Mislim da bi potpisnici Rimskog sporazuma, pola stoljeća kasnije, bili iznenadjeni kako uzbuđenjem oko toga tako i uspjehom njihove inicijative.

Rimski sporazum je važan iz više razloga, između ostalog i zato što je najavio raskid sa prošlošću. Dvanaest godina nakon najvećeg sukoba u istoriji čovječanstva, bivši neprijatelji su odlučili da međusobna neslaganja gurnu u stranu zbog budućnosti nove generacije.

Ova poruka treba biti jasna svima u Bosni i Hercegovini.

Dvanaest godina nakon kraja sukoba, građani i lideri ove zemlje suočeni su sa brojnim izazovima i odlukama sa kojima su se suočavali građani Evrope 1957. godine.

Bosna i Hercegovina također se nalazi na pragu potpisivanja Sporazuma o stabilizaciji i pridruživanju sa Evropskom unijom.

Čini se da neki ljudi misle da taj projekat ne može uspjeti zbog stalnih neslaganja, nepovjerenja i optužbi, koje su propratna pojava rata.

Ti ljudi su možda premladi da bi se sjećali nepovjerenja i optužbi koje su vladale u ostatku Evrope nakon rata od 1939. do 1945. godine. Ja nisam. Evropa se 1957. godine još uvijek borila s gorčinom i rasulom koje je sa sobom donio rat.

Državnici koji su prije pola stoljeća osnovali Evropsku ekonomsku zajednicu bili su u stanju zanemariti trenutne teškoće i okrenuti se prosperitetnoj i sigurnoj budućnosti. To je ono što danas moraju učiniti lideri Bosne i Hercegovine.

U ovoj istorijskoj sedmici za Evropsku uniju, njima se pruža prilika da postignu istorijski sporazum za budućnost nove generacije. Tu priliku moraju iskoristiti.

Hvala.